

四庫全書

集部

欽定四庫全書

公是集卷五十一

宋 劉敞 撰

家傳

先祖磨勘府君家傳

劉氏之先出楚元王世為彭城人西晉末避兵亂遷江南其後又遷廬陵世次皆不明不可得而知然猶以彭城為望自廬陵遷新喻者曰遜遜生超超生達達生璵

璵贈大理評事凡四世自唐末更五代頗假版仕州郡而未嘗有顯者評事生禮部尚書諱式字叔度少有志操好學問不事生產年十八九辭家居廬山假書以讀治左氏公羊穀梁春秋旁出入他經積五六年不歸其業益精是時天下大亂江南雖偏霸然文獻獨存得唐遺風禮部取士難其人甚叔度以明經舉第一同時無預選者由是江南文儒大臣自張洎徐鉉皆稱譽之調廬陵尉太祖平江南叔度隨衆入朝見于殿下黨類數

十人上一一親閱視察問皆罷遣獨叔度拜商水尉遷絳州推官又遷鴻臚寺丞監潭州茶場改大理寺丞歲終奏課倍前人太宗善之立召還對語便殿改贊善大夫復出知利豐監是時初得并州又絕契丹和親誅靈夏叛族邊費多有司不能給頗以擾民叔度通輕重以謂此非長久之利因奏曰唐虞至治懋遷化居所以調有餘不足便民贍國臣前在潭州見積茶成山或不能泄歲久則皆焚棄今利豐監積鹽復益多有司無術以

御之但坐守視之耳國家據山海之源而不能用邊寇小警蒐敝補敗輒以勞民至上下空匱甚非計也臣請通茶鹽之利被之河北關中國可益賦而財用足上異其言即以驛召入問計策語合意因留判三司都磨勘司賜緋銀魚自唐厯五代天下分裂百餘歲矣吳蜀交益荆晉閩越大者稱帝小者稱王其財賦自入不統天子有司及太祖受禪十餘年間吳蜀交益諸國稍誅降太宗即位閩越請吏入朝又定并州則天下始一統矣

四方財賦一歸三司文籍相乘會計不分明吏因為奸
主者無由知叔度建請增置主轄等司以參校出入天
子從之吏欺誣毫毛必察至今以為便轉祕書丞淳化
中高麗絕契丹自歸天子方事取幽州嘉其識去就厚
答其使因欲結其心斷敵肩臂使叔度往諭指王以下
郊迎叔度美秀明辯進退有規矩望見者皆心服先是
高麗大旱及使者授館澍雨尺餘國中大喜事漢使愈
謹自陳國小齒下願執子弟禮叔度不許然所賂遺甚

厚叔度亦為之納還朝封上天子善之高麗通中國自此始也轉太常博士領舊職前後以職事利害議於上前及所施行天下以為便者不可勝紀奏對明簡天子聽之率常數刻居磨勘之職十餘年後兼三部勾院條領益精明朝廷言輕重者皆自以不及故天下稱之劉磨勘云改工部員外郎賜紫章服天子令閤門使擇善犀帶以賜其見遇如此真宗即位例轉刑部初李維清為鹽鐵使其女壻盜用官錢數十萬吏畏維清不敢劾

叔度發舉其事維清坐黜維清由是怨而三司貪猾吏以欺枉為生疾叔度禁其業亦皆怨常狙伺欲塗陷之太宗察其情每坐朝輒衆稱其材故毀不得入太宗崩真宗在諒闇吏因此告叔度事時維清為御史中丞典治欲深致其文而吏所告皆虛反坐維清愈怒叔度既辨即出視事如他日維清乃諷吏劾以不俟詔入朝免官其年卒年四十有九叔度尚名檢好賓客所交游皆一時名人徐鉉張昞陳省華楊億之徒雖年輩先後待

之各盡其意億與石中立為獨拜牀下其見推如此初
太宗好書集祕府古書模其筆迹自倉頡史籀下至隋
唐君臣以書名世者為古今法帖朝廷宿儒鉅賢輒以
賜之非其人雖宰相終不得而賜叔度獨六十軸當世
以為榮自叔度沒四十年間諸子皆仕于朝每上郊籍
田輒以赦令追寵其親以至今贈禮部尚書

行狀

宋故推忠佐理功臣光祿大夫行尚書吏部侍郎

參知政事柱國太原郡開國公食邑二千三百戶
食實封四百戶贈尚書左僕射王公行狀

公諱堯臣字伯庸其先太原祁人六世祖為輝州刺史
唐季兵亂遂家焉今單州碭山是也後徙居宋虞城公
祖府君事親以孝聞其為政興利除害多陰德嘗言曰
我世當有顯者及公生愛之曰此兒庶幾成吾言公舉
進士天子程其文為天下第一授將作監丞通判湖州
年二十五矣天聖八年召試翰林改著作郎直集賢院

公考以事左官于蔡公亦請知光州以便親遷右正言是歲大饑百姓不能忍死羣輩望屋而食或抵極法公建言宜依荒政弛刑以全安細民朝廷用其議丁外艱去職服除為三司度支判官賜緋衣銀魚又遷右司諫郭后廢死議者不一而宦官閻文應方強用事公請獄治侍醫左右無狀者為朝廷除謗釋疑事雖不行物論多之后猶在殯有司張燈合樂飭供帳望幸乘輿臨當出公又言前以詔復郭氏位號則后禮不可闕觀燈非

禮之急毋使天下有間言者天子從之景祐四年以本
官知制誥賜金紫同知通進銀臺司魚門下封駁提舉
諸司庫務寶元元年召入翰林為學士改尚書六部員
外郎知審官院元昊畔西鄙宿兵公為體量安撫使將
行言曰故事使者所至輒稱詔存問官吏將校而初不
及百姓自兵興三年矣政煩賦重小大彫敝今攻守未
決宜因使者之出致勞來之意許以賦平蠲其租二年
則人人致力而忘死矣朝廷嘉其意以敕榜付公是時

賊馬出入鎮戎環州間官軍數不利士氣傷沮公按其地形易置將校調率民力皆因事授宜先行而後聞百姓便之還又言陝西兵亡慮二十萬分屯田路不足自守賊嘗三戰三勝者由以十當一也臣視地形涇原最可憂請益兵萬人屯涇州二萬屯渭州渭足以制山外涇足以控關中則賊不敢送死矣不然臣恐其乘虛復來潰決必甚又薦狄青王信种世衡劉昭孫等三十餘人可將帥先是好水之戰韓丞相為招討副使以偏裨

失律左遷知秦州而范文正公經略延州亦坐移檄讓
元昊不先聞謫守耀州公至為上分別兩人忠義智勇
可大任不當以纖芥為進退失士大夫心與宰相意迕
持其議久之未即行明年九月賊果如公策自鎮戎原
州以入敗葛懷敏之師數十萬衆乘勝掠平涼擊潘原
關西響震自邠涇已東皆閉壁自守于是范文正公帥
慶州之衆以出身自當賊衝賊由此不敢深入而議者
乃以前公言之是後以韓范為招討使置府于涇州益

屯兵三萬人而使公乘傳安撫涇原還奏曰陛下以邊事屬仲淹等而盛其備涇原誠得制勝之要賊必不敢動矣然軍貴神速不容呼吸願委以便宜毋令中覆上為許用其言凡公再奉使皆喪敗之後所籌畫施為便兵益民以利易害成全勝之策者大體若此其細不可勝紀廢函谷關示以不外拒西土懷之罷涇原五州營田益置弓箭手築德順軍張形勢之制省冗官黜無功事為之慮皆極其當賊于此止不為寇其明年因乞降

矣初曹瑋守渭州開山外地置籠竿等四寨募弓箭手
給田二頃教以耕戰使自為守其後將帥養視之不善
又稍侵奪之人人怨怒有言德勝寨將姚貴材勇為衆
所伏遂逼以閉城畔公適使還過之知貴素忠其畔未
能固立自作書射城中諭以禍福死生貴恐懼畏服即
日將其衆開門出降公復為申明約束使可繼守如曹
瑋之舊而去明年加戶部郎中權三司使既拜請自擇
僚屬許之以張昱之杜杞等十五六人為副使判官天

下稱其材入內都知張永和建言取民間房錢十之三以助軍費事下三司公持不許永和密使人致意曰公能行此則大用矣明日入見具為上言因曰此衰世之事非平時可行且召怨而携民唐德宗所以致朱泚之亂也上以為然而度支副使林濰畏永和勢助之說甚力公廷奏黜濰議乃定川峽轉運司奏乞增鹽井錢歲十餘萬緡公固不從上問其說對曰兩蜀僻遠恩澤鮮及而貢入常倍民力由此困朝廷既未有以恤之而又

牟厚利焉是重困也雖小有益將必大損矣上善其對
公之行已謀國論議向正不可回以利類若此其治大
計以知盈虛為急有所調發常先事因利不暴取于民
故能殖其財而簿書謹詳吏亦不得欺自前使姚仲孫
借內藏錢數百萬緡久不能償公居三年悉按籍償其
負而軍國之費猶沛然有餘以母老求解要劇六年正
月拜承旨歸院無端明殿學士充羣牧使明年丁內艱
皇祐初免喪還翰林遷諫議大夫上祀明堂加給事中

受詔與陳旭等議茶法當時頗言其便三年九月拜樞
密副使儂智高反殘十餘郡遂圍廣州公按舊事及地
形利害調兵遣將上常是之賊平公策為多又奏請略
準唐制分桂廣潭宜邕為五管重募土人增澄海忠敢
等兵以省京師遣戍之煩邊備益謹而衛兵以不耗減
至今使之樞府雖本兵然自中人宦官醫工伶師嬖習
近戚之進退除用皆屬焉公在位六年持法守正以身
當天下之務濫恩倖請一皆抑損教坊樂工不得補班

行中人非有功不以為三路鈐轄內侍兩省非年五十
無贓私不以為押班興繕土木之勞不以官為賞班行
百司失職之人其傷財而害民必再赦乃得用叙法皆
定律令天子深倚賴焉而倖進者用此怨公至為飛書
以中傷之上察其情不疑而購為書者甚急嘉祐元年
三月拜戶部侍郎參知政事張堯佐以女寵進至是復
有旨以為同中書門下平章事公曰堯佐未嘗出京城
無功勞不可假以相位由此罷三年進拜吏部侍郎八

月二十日薨于位享年五十六公為人雅厚信重以誠接物不修矯飾抗厲之譽士大夫以君子長者歸之其與同列議事必依于正時有不合反覆剴切止于當而已不以獨見為奇在上前所陳天下利害甚衆至施行之亦未嘗自名將薨呼其弟純臣口授遺奏大旨以宗廟至重根本未立為憂天子加愍惻焉親臨其喪輟視朝一日贈以左僕射印綬明年某月葬宋城縣敦孝原公凡所履歷典為具是矣至他所領審刑院尚書省之

類甚衆及累階勲開國號功臣又加以例進故弗論也
娶丁氏封安康郡夫人三子同老大理評事周老太常
寺太祝早卒朋老大理評事二女長嫁試校書郎戚師
道早卒次在室公本以文學進至為侍從典詔誥者十
有餘年其文貴體不貴奇也有集五十卷藏于家愛樂
士大夫稱為知人所薦拔初若不審其後多赫然而聞
嘗薦彭思永為侍御史首奏抑張堯佐不得為二府朝
廷稱之右謹條僕射公世胄官簿行事如右請牒太常

議所諡及乞銘于立言之君子以誌其墓伏惟加詳擇
焉謹狀

王開府行狀

維王氏得姓于周靈王之子晉晉既仙去而世人指其
族曰王家其後翦以秦將顯東漢有處士霸霸生孫甲
徙居于祁自是太原王為著姓元魏時固為廣陽侯侯
二子神念神感神念避亂南奔梁神感北事齊而其家
散處宋鄭間子孫蕃盛至丕又徙開封陳留之通許鎮

鎮後為咸平縣今為開封咸平人者公之高祖也世以
貴雄曾祖太師公祖中令公皆好義周急蓄德不顯至
考韓國公仕為江寧句容縣令後以公貴贈皆太師封
大國追封曾祖妣李氏義寧郡太夫人祖妣張氏同昌
郡太夫人妣張氏同昌郡太夫人趙氏會寧郡太夫人
李氏吳興郡太夫人公吳興出也少奇警力學能文詞
天聖八年舉進士仁宗廷試以為天下第一時年十九
拜將作監丞同判懷州改潁州以吳興憂去官繼丁韓

國公憂居喪摧棘杖乃能起景祐二年服除改祕書省
著作郎直集賢院建言朝享太廟祝文著后姓非是請
止以謚別之廢后郭氏卒詔葬以后禮既啟敢天子以
上元御樓觀燈公以謂春秋晉大夫智悼子卒未葬公
燕于寢杜蕢諫止之君子臣義且若此矧后生雖見貶
而死被尊禮宜有恩也請罷元夕燈燕侯十七日遣奠
仍禁士庶聲樂三年充三司鹽鐵判官賜緋銀魚袋五
年權同修起居注轉右正言寶元二年知制誥充北朝

正旦國信使明年賜三品服制太常禮院同知通進銀
臺司兼門下封駁事同知審官院當三班院公言廣南
幅員千里鄰控蠻獠而節制所總止桂廣二州邊阻勢
離蠻或窺犯緩急不及事請倣唐制以東路之廣潮西
路之桂容邕分管以密援疏上不報其後十年儂智
高陷廣州又二十年李正德陷邕廉欽於是人思公言
而服其識明年充益梓路體量安撫使是時兩川荒饉
公私凋殘既至奏蠲逋負閱官吏良否多所進絀之人

大慰說蜀郡媼某氏多貲無子一孫才數歲媼意以貲厚其弟顧難于其婦乃詣郡誣婦不善撫吾孫願出之獄具公至立姑婦于庭置兒其間兒急趨母公曰豈不善育也媼伏誣狀又里民孫氏產刀鉅萬死而子幼其妻念門戶事請其兄經理之嫉者或告其畜禁物州用坐長法以徒當其兄且誣其妻不睦于夫常祀神呪詛將以義絕出之公曰良人已歿而妻以罪出甥家犯禁而舅為共犯非禮律意聞見所無皆奏正之二事蜀人

夸以為神明未還拜翰林學士慶厯元年知審官院明年同知貢舉契丹之盜邊常為塘水所限是年春其使劉六符謂館伴賈文元公曰南朝塘濶何為者也一葦可杭投筆可平不然決其隄十萬土囊遂可路矣時言事者亦請涸其地耕以養兵仁宗以問公對曰兵事尚詭彼誠有術不應以語敵此六符夸言耳設險為國先王所不可以已而祖宗之所以限敵騎也仁宗深然之其後神宗復嘗問之公對如是神宗曰正朕志也是北

敵以王師問罪元昊故謀為牽撓勒兵境上使六符為
不可得之求耳七月富文忠公再報聘既行繼有詔附
文忠以賜六符文忠疑國書與政府口宣及詔語或參
差至中路啟書果異遂倍道馳還叩閣門請對公方攷
試後殿仁宗急召諭之曰毋須同列往獨視之公歸院
與文忠議一夕易其書詔大要以強中國絕後日牽制
為意前此敵書有太宗皇帝於有征之地才定并汾以
無名之師直抵燕薊之語一時莫知所答公獨請問曰

臣知其故因奏書云太宗嘗駕并郊匪謀燕壘於是貴國刺梅里求致書行在而反潛假其援兵既交石嶺之鋒遂舉薊門之役仁宗喜曰乃自有本末諭執政曰非王某該詳故事殆無詞也十月敵泛遣蕭階來議事公實館伴階因請為我禁元昊犯邊而指在求賂是時朝廷亦已厭兵矣及階行燕于班荆始詔公許階誠能約束元昊則當班師可錄詔語付階公以詔書予之使常得持以邀我非便但詳諭階而已還奏之仁宗善之曰

唐之回鶻恃功王室難制幾有之也轉起居舍人十二月知開封府踰日都城肅然明年上元故事籍嘗為盜惡少每至是拘之獄公呼諭遣之曰倘更為官得盜當除爾籍皆拜而去五夜無警三月以諫議大夫拜御史中丞李用和以元舅除宣徽使意不滿不謝居數日除彰信軍節度使同中書門下平章事公言杜審瓊太祖太宗舅事兩朝有勞然終不至宣徽使祖宗所以保后家也用和無功貪驕而陛下名器聽其所欲恐非所以

全安之欲報母后厚賜之可也兼判國子監請開錫慶
院以廣學官因請車駕視學夏文莊公經略西師久無
功移疾歸淮西未幾召為樞密使公言竦無忠諒之節
專為身謀當要重之任不深惟報効而以疾為辭今遽
擢起是避事為得計也無以厲世又入對極論之而仁
宗未省遽起公引帝裾畢其說遂罷竦石介作慶厯聖
德詩所頌一事也蘇舜欽子美監進奏院鬻故牘得緡
錢數千夜召朋友宴集客或為做歌有醉臥北極遣帝

扶周公孔子驅為奴云者公彈劾之遂坐黜又言中書樞密院總天下機務職分不明執政之臣勞而無功日五鼓趨待漏院閱文書以待陞奏退集議歸近已午數刻之間占書施行未既已逼再集講明日事矣酬酢有不逮何暇安危遠慮哉古所謂三公坐而論道作而行之謂之士大夫則繁簡固有節奏請以今事細例孰者歸之有司仁宗既用公之議升章獻明肅章懿章惠皇后祔于真宗廟室因言藝祖孝章皇后嘗正位號而祀

別室非是亦請升配時不見用至元豐中卒如公議李
良臣陷於敵數年來歸議增六室復閤門故職公言良
臣雖能終自拔前不死戰為賊俘實有罪今加賞叙無
以示後李廣漢名將陷匈奴得還議當斬贖為庶人蘇
武不屈節白首歸漢才得典屬國古之馭將法義如此
良臣宜待後效興國僧紹宗鑄鐵象妄言災福惑衆聚
財士女傾赴之以金銀器飾投諸冶中貴人督作宮掖
出貲佐之公以為西師宿邊而財費于不急動士心起

民怨詔立還中使禁止之又言四月朔太陽當虧經典所忌請罷游幸西苑諸后既升祔賜羣臣帛有差以公由翰林學士遷特命倍賜與學士等公曰不敢以臣廢法屢敦諭訖不受天章閣待制滕宗諒帥慶州以邊事用度無藝軍費幾屈公累疏之遂宗諒岳州五年官伴北朝回謝使六年春復拜翰林學士兼龍圖閣學士權三司使公言太祖時兵十二萬太宗時十八萬章聖時四十萬今遂倍之兵在精不在衆冗數坐食非計也三

司雖總財用大計而事實在外請太原大名永興帥臣
各帶計置一路糧草是冬請補外改侍讀學士兼龍圖
閣學士知亳州改鄭州明年三月轉給事中七月移澶
州明年拜尚書禮部侍郎坐舉張得一罷職是年河朔
大水民流亡朝廷分河北為四路冬置帥公以本官充
高陽關路安撫使知瀛州至則為方略振哺全活甚衆
皇祐元年春復兩學士五月充永興路都部署兼安撫
使知永興軍七月改河南府兼西京留守十一月轉戶

部侍郎河東安撫使知并州兼本路計置糧草四年還
朝知審官院充翰林學士承旨兼侍讀判太常寺公在
經筵每進讀必以古義反復勸上以傳當世之事仁宗
于邇英閣置太原經著草顧曰宮中每閱此卿亦知其
說乎公具對本末因曰願垂意六經正史此非帝王所
宜學翌日已徹去五年知貢舉至和元年充三司傳充
回謝北朝國信使見敵主于混同江敵每歲春帳于水
上置晏釣魚惟貴族近臣預一歲盛禮在此每得魚必

親酌勸公又親鼓琵琶以侑之謂其相劉六符曰南朝
少年狀元入翰林十五年矣吾故後之使還除宣徽北
院使言者以公是行遇正旦使宋選于靴淀選與敵使
爭不直公實與會即改端明殿學士知永興軍嘉祐二
年移秦州羌族賸藥木征角廝囉連衡更出歲為邊患
公以威信誘服皆請吏修貢西境無事知河南府知定
州八年英宗即位拜兵部尚書治平二年知大名府兼
北京留守京師大水公上治平政鑒十篇大槩謂宜寅

天尊祖慎威福判真和愛民補兵以答天誠神宗即位
拜太子少保遣中使李舜舉詔曰卿曾獻忠先朝今宜
有輔不逮者公約政鑒之義上聖政備覽十篇明年檢
校太傅宣徽北院使再任熙寧初西邊久無事而疆吏
產謀造端公極陳所以綏懷之者夏人果使橫山族殺
保安守將楊定繼遣使以其主諒祚計至公請選勇辯
士詰取害定者羗果送之戮於境上而受其使未幾邊
將又遣兵攻羗境羗復犯我慶州我亦取其蒙古城公

知邊患未有艾也復上疏言章聖得潘羅支而繼遷之
患息仁宗得喃廝囉而元昊裒今橫山五族與吐蕃董
毡等衆族世受王命今宜以恩信深結之可得其用是
夷狄攻夷狄之道也又請按求唐韋堅裴耀卿水運以
實關中唐引粟江淮為回遠今可漕太倉粟則比唐為
易其言道路甚悉常因日蝕上天下形勢憂勤啟聖為
政先後三論召還有大臣語公曰今大新百度能少默
當進矣公謝曰士固欲得位以行其志然未聞枉志以

求位也遂論新政謂青苗助役皆縣官漁利謂諸役法困民惟衙前籍上米石使相助若可行以代吏祿然是竭良民以養浮浪公于是不得留京師去留守南都四年判河陽五年再判河陽府八年還朝兼中太一宮使言今天下兵分隸所謂三十六將臣觀其人皆鬪將而已倉猝當悞事又言國馬大事監牧不可廢交趾襲邕管罪不可赦宜募兵江湖使習風土便器械賦芻糧于荆閩則無勞費公懇求閒退章八上元豐元年檢校太

尉南院宣徽西太一宮使賜金方團帶先塋得置寺皆
異禮也歸居洛陽面辭陳天下利害有人所難言者自
執政而下侍從館閣士大夫皆為詩以美其行三年替
出西方詔求直言公上疏大要以愛民省事為本願振
滯淹伸冤枉蠲逋負秋大享明堂詔入陪祠既畢事召
對曰北門常須舊德而卿故治也當再勞臥鎮之又屈
指數曰某年召卿歸矣時三路籍民為保甲下戶皆不
免日聚教之提舉官禁令苛急河北保甲往往為盜賊

百十為羣州縣不敢以聞公極論其弊謂非止困其財
力害其農業所以使為不良者法驅之也將恐浸淫為
大盜可憂願蠲裁下戶于是主者指公沮法異國論公
曰此老臣所以報國也章入不己天子始悟保甲之為
盜也六年三月拜安武軍節度使再任八年三月今上
即位拜彰德軍節度使公再至魏前後求退章累上不
許七月寢疾詔遣中使挾國醫臨視二十一日薨于府
第之正寢訃聞兩宮驚悼遣使慰卹賜予甚厚又朝中

貴人護喪歸洛以開府儀同三司告其第公儀觀端秀
動容步武皆有規度語韻如鐘于書無所不觀博雜涵
茹而折衷于孔氏為文章渾厚清偉尤長于此事儷辭
平生奏章皆自為之至老不以屬人對賓客喜清談論
文誦講古人詞章及國朝典故少遭天下無事仁宗嚮
意經術獎用文學士公翱翔出入論思謀謨知無不言
言無不盡指切權近發明時政無回隱侃侃諤諤白首
逾壯故逮事四朝多見納用而眷遇深渥在朝廷清塗

要地踐履周遍外之名都大鎮多再至者所至首訪民
所同患所同欲廢舉之專以愷悌之情與人休息人是
以安樂之去而思之深也雨蜀魏定皆立生祠士大夫
皆曰王公之志雖不得坐廟堂行之然內外五十餘年
凡詔告于上設施於外其及物者蓋多矣累典貢舉遇
士有大體號為得人公少喜道家說其于頤生練氣蓋
有自得之者故年益高神明益強臨終且索筆草奏求
輿疾歸洛奏成而目瞑詞氣不亂或泣于傍猶搖手止

之兄弟十人從子孫衆多以公官以公嫁者數十人疎
族寒士有謁必厚之薨之日橐無餘貲而孫猶未有官
者公娶薛氏資政殿學士簡肅公之女追封平樂妹今
封和義郡夫人子男七人未名而卒者四人仕而卒者
二人曰正甫奉議郎曰端甫大理評事次曰晉明今為
承奉郎任公裕孫亞卿而卒者三人今二人之壻曰節
度推官石宗彞宣德郎呂希亞孫男七人秉文景文並
承務郎敏文假承事郎資文尚幼餘早卒女三人曾孫

男女三人公所著內制外制集各五卷奏議十卷文集七十卷王氏世葬開封府開封縣之蘇村至公始葬其考韓國公于尉氏縣之柏子岡今又卜之地得于河南府河縣教忠鄉府下里而日得公薨之年十二月之甲申吉乃葬公焉公舊名拱壽唱第日仁宗面賜今名謹具公世系官事始終上尚書省移于太常告于太史氏謹狀

先考益州府君行狀

公諱某字某世居江南之臨江而望彭城曾祖某祖某
避五代亂皆隱居不出考諱某入朝廷仕至工部員外
郎沒因葬京師累贈禮部尚書國史自有傳公于尚書
為中子生十三歲則丁尚書憂哭泣毀墓過于成人及
雖免喪哀至則慟哭聞者皆感動太夫人陳氏尤憐之
常曰此兒能不忘其父吾可無憂讀書學問未嘗煩教
習又自約敕不輕與人往還不多言笑祥符初以進士
及第年二十四自尚書薨公兄弟皆幼惟伯兄以延賞

就仕其餘未有立者公首自奮用文學成名不失世守授福州連江縣尉職典盜賊刑獄所發擿縱舍窮極情偽未嘗小愧于心民有鄰里爭田者訟之慙十餘歲不決即舉其事屬公公立辯其奸吏大驚以為神其後公替歸所訟得田者私候公于建州屏人請曰聞公北還某有善香數斤願以為壽發視之白金也公笑不取曰吾豈以公事祈私報耶命之去調睦州清溪主簿民至今傳以為自清溪入宋朝吏廉潔愛民者未有如公改

宣州南陵令是時李階知州事朱正辭貳之兩人皆精悍負其材能于吏事刻深待屬縣多易屬縣亦憚之奔走趨向不敢不如意及公至以法令從事符下不便者按其故辦之不為少屈兩人初忿後無如之何數自絀所見遂更為相知薦公于朝嘗權績溪績溪在深山中民好訟多事而無學者公患之為立小學請師于旁縣及公去有讀書者其後有舉進士者慶歷中有登第者與某同年具自道如此云改大理寺丞知婺州金華縣

縣治城中民以織作為生號稱衣被天下故尤富是時
禁網尚闊守丞至者不甚以廉自持吏民有所請求輒
移縣改章易辭以為俗公一一絕之善善惡惡貧弱者
得職胡則以太常少卿丁憂居杭州其鄉人所親有犯
法者公持之則欲為之請自杭州來見公既見但叙平
生卒不敢言而去乾興初上即位改太子中舍移梓州
中江縣歲調民數千治隄縣前多不如實公較之省其
工半而築作精堅倍他歲李若谷知梓州條公所行事

下他縣使為法自中江徙通判瀘州百姓相率畫公像于浮圖舍對之號泣如失慈母瀘州在西南徼上與戎夷接境自前世以武人為守苟置勇力不習吏事聽訟決獄不得其情故盜賊時時亂邊天子憂之議增置通判使轉運使上其人時任布為轉運使以公治中江之狀聞故公得之公在瀘州始盡去舊弊峻其防禁事事有守吏不得因緣為欺蠻夷亦無由與吏為怨百姓便之其後皆遵川以為故事自未置通判郡不能數歲無

兵及置通判公首為之興事創法究其利害遂以安寧
至今王蒙正以財雄巴蜀而與莊獻太后有連自請占
鹽井利每歲倍輸事下轉運使轉運使不敢抗因以屬
州蒙正多齎金帛挾太后指以請公不肯曰井鹽非王
氏之舊欲奪貧民以厚豪族雖歲加數倍之輸于朝廷
猶秋毫耳而貧民必有失業者非王政也事遂止轉殿
中丞通判常州改國子博士知高郵軍高郵故揚州太
祖時置軍自社稷孔子廟城郭門戶倉廩郵亭因循不

中儀制歷六七十年公補舊造新大小皆繕修一瓦之用不以勞民而事畢立王琪叙其語刻之石賜五品衣魚明道元年江淮大旱蝗蟲起揚楚間尤甚公悉心撫輯使富人出粟以分貧乏然猶有羣輩持仗為盜者捕得皆當死公安其情無他悉管遣之前後數十百人益募壯健為兵或曰大旱來歲未可知倉廩且不足多此冗食何為轉運使亦以為言公曰凡人有七尺之形者必不忍坐俟死急則起為盜賊耳勝廣亦是也足其口

腹可以消其邪心何憂於倉廩因奏言州郡無兵荒儉之後易啟盜賊心宜稍增屯防以俟歲定朝廷從之揚楚廬壽諸要處皆益兵是歲米一斗數百錢然盜賊終不敢發還朝轉虞部員外郎又轉比部知潤州前守三四公死徙相繼獄訟或數歲不決帳籍當上尚書者吏稽緩亦往往出歲因恣為欺謾公下車數日間舊訟盡決平之帳籍盡條正之轉運使王夷簡上狀于是復置諸路提點刑獄就除公福建路在福建三年察大冤濫

除盜賊舉故事而已不輕出教令奏貶知泉州蘇壽通
判張太冲以鞠獄入人死屬部莫不聳動轉司勳員外
郎入朝御史中丞攷天下提點刑獄課為第一拜開封
府判官公既明習法令通達政事每進見有所請讞平
處上常以為是寶元初除荆湖北路轉運使將行對于
紫宸殿語移數刻上喜曰卿去勉之不久當召卿賜紫
章服丁太夫人憂解官時張詰為河南澠池令鞠獄故
不寔流嶺南詰者公福建時部吏公嘗薦之故公亦坐

免服除寄居毗陵故丞相杜公衍參知政事李公若谷
參知政事范公仲淹皆奏言西邊未寧宜進用材幹通
敏之士如劉某者不當在散地由是復召為比部員外
郎知漣水軍作大浦牘通淮潮城中以便往來詔書褒
美蘇舜欽刻石記之慶厯三年議大汰諸路轉運使老
耄疲懦者以雋賢代之加按察之號公復為湖北轉運
按察使是時陝西路元昊廣西路宜蠻湖南路山獠夔
峽路施蠻皆擾亂朝廷方患之而下溪州諸彭亦相扇

應和推明哲石柱揚言為變諸寨頗有告者詔書問公
公對以謂終不能為變可無所憂後辰州太守又奏請
彭誘漢人亡命者為心腹私置椽從事移書故不遜郡
使人往輒侮慢玩辱請加兵討滅詔書又以問公公曰
蠻中貧薄所以不輕犯約束以生生之具皆仰于漢也
是漢已制其命矣蠻夷往來入漢必道辰溪落寫水勢
漂激可下不可上故臣度其必不敢為變今緣語言意
氣小不足欲輕動大兵疲戍士卒于篁竹草莽之間如

令敵各驚逃保據懸險淹費日月事未可究且中國禮義為治尚猶有怨恨爭訟加于刑獄况蠻夷本與人異不足深誅前世待蠻夷取羈縻職貢不絕而已臣前較辰州土工無慮三萬餘皆伉健可用並積粟支二年器械兵甲皆繕完足以坐待其變無為反入其巢穴以僥倖也比來諸處用兵小勝輒賞或詐增首級亦超拜官故邊臣爭欲造事邀功甚不可聽奏入詔書並下辰昂澧三長郡吏令兵事稟公毋得妄動蠻亦終不敢失貢

職鄂州官市茶歲五百餘萬斤三司計積年羨餘奏請
增買一百萬三千餘斤公曰鄂州買茶多故民不聊生
今已不能減又奈何增之引利害固爭上許寬一年公
曰事可行不必寬一年事不可行雖寬十年猶之不可
也奏益堅為三司所抑及替還見上面奏竟免之初置
按察使歲竟奏簿分別賢不肖所宜以備黜陟取舍朝
議欲自此致太平奉使者知指所稱進糾駁人人為品
題或過直失實務以稱上意執政平其章十用二三以

究自訟者紛然公獨言知仁堯孔所難能以一言知之
固尤難荊州十二郡吏員大小四百餘臣以秋到職冬
奏簿此理不可信非誣則愚臣不敢也吏材過人效顯
然者立奏用其頑頓嗜利不事事者立舉繩皆毋須時
至于奏簿人人品題其賢不肖能否必非旬日所能定
願以為後朝廷亦許之公之議論鄭重務大體不趨時
皆如此當是時荆湖奏貶官吏比他路為少而請讞與
聽罰必當其罪終無自訟者然公資不忍廢人雖在刺

舉之職外方嚴見繩墨內實寬裕恥以察為名其發擿貪污必先下小罪去之毋居位而已不去乃稍正其罰然疾詐謾不悔過者居部雖無勢或虧除不服罪偃蹇去之遠雖有勢終不貸寧建令李康在事多不法公先露其擅賦民造船等事康即日移病尋醫康多親戚有力人居朝未月餘就遷長沙令康因盛衣服詣府門上謁陳思公知其意欲以夸示無忌憚奏詰其前事因言舊制尋醫者滿三年乃復用所以懲奸偽康尋醫未能

月何以得以為縣亂舊制輕百里之任不可詔書追毀
康告敕時康已署事旬日矣湖南轉運使又奏康挾債
赴官使吏民償債康遂坐廢云慶厯五年復拜司勳員
外郎六年判三司度支勾院鹽鐵判官舊三司諸部有
所奏辟輒先白判使相踵以為俗其後判官置奏狀而
已或不自知所舉為誰及公至三司使有所欲用以空
名狀使公署公求知舉者姓名三司使不悅更令他判
官舉之既而奏上多非其人議者紛然三司使亦由此

罷契丹使公來以太常少卿接伴遂送之還言河北州郡多建請築城鑿河所役皆數十萬工冀貝之間尤甚百姓失業可哀而吏以此邀賞苟不禁止後將放傲競事土功因緣致他變宜著令城非陟頓不得擅請增廣河渠非可通漕省大費者毋議穿鑿當修城浚渠者雖能省功亦不加賞如此自止矣又言澶魏塞河堤當霜降水落治之是也今失其時春水日生農事方急而十餘萬人不得緣南畝其取土處去河三十里以上恐終

不能成工就能成之功必不堅盛夏水漲乃甫可憂不
如因水勢所欲趨且稍稍決通兩州東西多古河水自
此自可以少勞而定朝廷以公言頗黜諸土功又遣近
臣行河城猶築治如故間一歲河竟決商胡鹽鐵于三
部米鹽煩劇公處之若無事初金明池樓船壞將修之
使湖南入梗楠巨材歷二年乃到京師計其費數百萬
以上中人用事者欲盜取之指請修內寺上許焉書下
三司公因見言曰樓船非梗楠不可用故令湖南上之

捐費雖多不得已也其餘自宮寢之用不以勞遠人今
欲輟船以完寺寺既當完船亦當修湖南絕遠費殊未
易上曰朕本不知此木為樓船用所費如此寺與樓船
俱未湏修也乃止太祖作東西水碓以供禁中歲久頗
廢因不復用自御膳所供麪皆市買上之所由旁緣侵
漁京城內外以磨礱自給者皆厭苦之公復修兩碓使
遵舊職而禁絕奸吏事多若此不可勝紀又以太常少
卿使契丹八年五月改主客郎中益州路轉運

因請曰蜀人久安不可不慮其變臣聞益州舊輸河東
陝西京西三路絹布共一百六十餘萬自西兵以來稍
增七十九萬事出一切足用而已今西鄙幸定諸增賦
反因循為常臣請盡罷之無竭民財又益州歲買中沙
布十餘萬足給京師諸軍官估既薄百姓苦之布以故
尤楮惡不中用軍士得者人人有言宜增實其估寬民
力止怨亂上皆許及上任遂條奏行之蜀人大喜相賀
其年十一月二十六日薨于位壽六十四初至蜀未能

三月蜀人皆啼號失聲明年孤某等奉公喪歸京師公
為政喜興利除害無巨細必盡心上有賦調可免免之
或不能免為設方法使吏無所輕重雖領轉運及參度
支鹽鐵事以財賦為職猶持此心不變專以民為本事
有不可行雖出上指或所從來久遠終持之不憚改及
其施功效明白亦終不自矜其用刑威而不煩故所至
必見愛去必見思自初仕至終四十年終不營產業饋
遺雖故人不受不與人交利不諂笑尤慎交游非其人

不以虛言相唯阿不數干貴人之門杜李范諸公皆平生相知每衆稱道之然當位亦不用也官遂留落後輩多先之初無芥蒂常稱先君仕太宗朝居一官終身雖其時士大夫樂職恬勢亦皆然故所興造功效聲實常溢其望今士大夫亟遷官無宿業此風俗之敝也吾豈敢忘先君之守自坐張詰免後三遷皆以大臣薦論及用稱功勞特拜不復經審官院求磨勘故為司勳前後凡十五年多所稱舉已顯者今樞密直學士孫沔天章

閣待制社杞田瑜本以屬吏進其餘在臺閣者甚衆積
階至朝散大夫勲至護軍夫人臨沂縣君王氏屯田郎
中贈尚書右僕射礪女夫人初歸家尤貧能與公協志
上事姑下收宗族叔妹無不安悅諸妹如來歸者皆在
夫人後動靜施為視夫人為法莫不柔順或以母禮拜
事不以先後匹敵亢也太夫人少不見則思之太夫人
既終夫人思慕成疾歲餘亦不起年五十三康定元年
五月十二日也五子元卿真卿皆早亡其大理評事攸

鳳翔府節度推官故太廟齋郎長女嫁廣德軍判官杜
舜元早亡次嫁御史臺主簿張諷次嫁將作監主簿徐
頴其等皆同產惟放及一女五歲晚出云葬祔尚書公
夫人同墳伏以先君事親行已臨政治民事實皆可傳
某既愚闇不能脩識而窀穸逼近願因執事傳載于石
以信天下而重無窮某雖不肖然執事幸哀而許是成
某之終事而賜以不朽也故敢頓顙泣血以請惟執事
哀焉謹狀

公是集卷五十一

欽定四庫全書

公是集卷五十二

宋 劉敞 撰

墓誌銘

皇兄故金紫光祿大夫檢校太子賓客使持節祿
州諸軍事缺州刺史充本州防禦使上柱國天水
郡開國公食邑四千四百戶食實封九百戶贈昭
化軍節度使追封祁國公墓誌銘

公諱永裔秦悼王孫贈保平軍節度使鄖國公之子母
李氏生十五年以勝衣冠召見賜名補右侍禁上之開
國壽昇及為皇太子也公皆以恩遷凡三遷至內殿崇
班上即位拜禮賓副使西京作坊使內園使領貴州刺
史又遷左領軍衛大將軍本州團練使左龍武軍大將
軍萊州防禦使宗祀明堂助祭者賜爵一級徙缺州防
禦使罷將軍官皇祐五年九月庚午以疾薨享年五十
有七公之子屬籍天子兄也天子哀焉為輟視朝贈以

昭化軍節度使祁國公印紱遣中貴人予祠襚賙護喪
事恩禮甚厚公性聰敏開悟其為兒時已能自修飭真
宗皇帝憐之嘗召入禁中親諭使學而授以書由是益
自喜數應制賦詩詔輒褒之及長好學慕善動靜顧禮
不以富貴加人累階金紫光祿大夫勲上柱國爵開國
天水郡公食邑四千四百戶實食九百戶自祖宗制天
下監于前世惇敘糾合以睦宗族厚其爵祿尊寵之而
不任以事故宗室得以無吏責自保而材美亦無以見

于世然其保祿持寵至于永年善始令終而無纖芥者
其賢行亦足以推而知云公娶韓氏封高密郡君彰德
軍節度使重贊之曾孫禮賓使允昇之女先公一年卒
繼室以武氏左清道率府率昭信之女仍封高密子男
十人曰克平右衛率府率早卒曰克寬克友克仕並右
監門衛將軍曰克勇克研並太子右內率府副率其一
未賜名出後伯父承簡三不及名而大女八人長適東
頭供奉官王延之次適西頭供奉官楊應昌次適右侍

禁高凱次適右班殿直石立皆有湯沐之封其二人尚
幼二人早卒公之薨也殯奉先寺嘉祐五年有詔歸葬
汝州梁縣乃以十月某日祔其祖先王之兆使者視襄
事而詞臣刻銘誌其墓曰

秦惟寵王郢亦貴公嶷嶷其國是為小宗勝衣就傳實
敏實聰為善之樂簡于帝衷富貴不驕動而顧禮棠棣
之華莫遠具爾古也惇敘于今為美壽不百年令聞不
已喪還汝墳從先王居天子有命懿實是書納石幽堂

恩篤禮殊茫茫萬世敢告不誣

皇侄故金紫光祿大夫檢校國子祭酒右屯衛大將軍兼御史大夫輕車都尉天水縣開國伯食邑九百戶贈洺州防禦使廣平侯墓誌銘

贈洺州防禦使廣平侯克溫郎國公德鈞之孫濮州團練使承偉之子母曰范氏以天禧二年十月十日生十餘歲賜名補右班殿直轉左侍禁改太子右衛率府率右領軍衛將軍上祀明堂遷右屯衛大將軍皇祐五

年閏月丙戌以疾卒享年三十六詔以洺州防禦使廣平侯之印紱策書告其殯又特使中人弟賻視喪事于禮為豐侯為人謙遜敏慧能以其貴下人嫻于辭令應對涉獵多所通而尤邃音律積階金紫光祿大夫勲輕車都尉爵天水縣開國伯食邑九百戶上于宗室固厚而侯之資又足以持富貴使幸而永年且久觀太平之盛其名位豈少哉夫人宋氏封壽安縣君太子太師贈侍中彥筠之曾孫也子男七人其四未及名而卒叔徹

為右千牛衛將軍叔民太子右內率府副率其一人未
賜官女六人長適右班殿直李傳其一早死四尚幼侯
既卒天子哀傷之使中人取以入度其一為女道士而
養其三人者禁中嘉祐五年十月詔以侯之喪祔于汝
州秦悼王之園而誌其墓中臣實為之銘銘曰

葛藟之延本根是賴懿懿王族曰繁以大廣平蚤秀華
葉俊茂中道而摧天理誰咎梁汝之壤先王是塋魂兮
往居萬世攸寧

皇弟故金紫光祿大夫檢校太子賓客左監門衛
大將軍使持節昌州諸軍事行昌州刺史兼御史
大夫柱國天水郡開國公食邑二千二百戶食實
封一十戶贈涇州觀察使安定侯墓誌銘

贈涇州觀察使安定侯承操秦悼王廷美之孫廣陵康
簡王德雍之第六子母曰清河郡君崔氏乾興元年正
月生廣陵邨天聖九年召見賜名遂以為右侍禁再遷
東頭供奉官改右千牛衛將軍左監門衛大將軍天子

祀明堂以三后配上帝宗室皆助祭內外進爵加昌州
刺史嘉祐三年正月乙未以疾終于位享年三十有七
計聞天子哀焉詔以涇州觀察使安定侯印策告其柩
又遣中使視喪事弔賻之于禮為豐即以其月殯城南
奉先佛寺君為人敏慧有姿望嘗授尚書畧通大義愛
樂賓客接之窮日夜不厭于技藝多所通而琴奕射御
皆尤精過人又能為歐虞書號得筆法娶王氏封普安
縣君贈太師中書令兼尚書令守城之孫崇儀使令傑

之女前卒繼室以其姊內殿崇班令短之女封新安郡
君子男五人長克勉太子右內率府副率次克助右千
牛衛將軍次克貢次克勅皆太子左監門率府率克勉
克貢早卒其一不及名而三女亦皆夭死嘉祐五年自
京師歸葬汝州梁縣祔于其先王之兆其窆之日實十
月某甲子云銘曰

帝綏四方親親以睦秦為別子亦疇其福翼翼諸孫豈
伊異人念德畏義克亢其門安定幼慧敦書習藝不怠

不驕以保爵位沒有追策天子之思刻銘幽室後世是
詔

皇侄故金紫光祿大夫檢校太子賓客右監門衛
大將軍使持節潯州諸軍事潯州刺史兼御史大
夫護軍天水郡開國侯食邑一千八百戶贈邠州
觀察使追封新平侯墓誌銘

贈邠州觀察使新平侯克構者上從祖兄之子曾祖曰
廷美秦悼王祖曰德彛潁川郡王父曰承最贈宮苑使

宣州刺史母劉氏東平郡夫人生十餘歲召見賜名補
右班殿直再遷西頭供奉官天子以謂宗室以服屬為
親疎其授之官雖無事當使位尊而秩優以寵異之不
當與庶姓等由是改右千牛衛將軍遷左監門衛大將
軍皇祐二年助祭明堂領潯州刺史嘉祐元年十二月
辛未以疾卒于位訃聞天子加哀憐使中使護喪事厚
賻卹之而以邠州觀察使新平侯印策告其樞侯之為
人溫厚有姿望能自飭以禮舉止甚厚事太夫人以孝

聞喜讀書為詩又善射好虞世南書學之幾得其法嘗
與宗室召對各使寫先帝自所造歌詩第其高下侯所
書第一受詔敦獎上與族人嘉善而矜不能所以教育
矯括之惟恐不至其有一善輒加賜金帛以厲其意而
侯嘗以材見優故于其時受賜為多累階金紫光祿大
夫勲護軍開國郡侯食邑至一千八百戶享年四十二
夫人李氏吳王煜之曾孫右侍禁繼榮之女封樂壽縣
君先侯十二年而卒又娶王氏贈鎮南軍節度使中正

之孫東頭供奉官世昌之女封仁和縣君子男六人長
叔璫右千牛衛將軍次叔況太子右監門率府率次叔
派叔姥皆太子右率府副率其二人不及名而死女六
人長朱嫁而卒次適左班殿直郭昭彞次適右班殿直
劉君平其三人不嫁學老子法居延寧宮為道士天子
賜之名曰洞仙洞深洞惠云其一亦早死嘉祐五年十
月詔以侯之喪葬汝州梁縣其先人之兆銘曰

麟趾之詩王風是首顯允公族其德信厚猗嗟新平資

質淑溫知孝其親信厚之元不忌不矜技藝畢能以善
自名天子是稱生有榮耀沒有褒錫刻此銘章以告寔
宥

皇姪故銀青光祿大夫檢校國子祭酒行右監門
衛將軍兼御史大夫上護軍天水縣開國子食邑
六百戶贈右武衛大將軍墓誌銘

君諱克蕭于上為從祖兄弟之子曾祖曰秦悼王廷美
祖曰高密郡王德恭父曰循國公承慶母劉氏封金鄉

縣太君君以天聖八年生數歲補右班殿直俄而改
太子右監門率府副率其後又遷右清道率府率君于
宗室屬籍非甚遠自曾祖祖父皆王公積富貴君始為
兒未能就外傳則以恩賜名得官矣然猶知慕學興藝
不專以安逸自放皇祐中嘗召宗室子弟對延和殿試
其所書敕宗正定高下君書第一特詔東帛賞之宗祀
明堂助祭者皆賜爵遷右監門衛將軍嘉祐二年四月
癸丑以疾卒享年二十八詔贈右武衛大將軍君娶徐

氏封東陽縣君兵部尚書翰林之曾孫西頭供奉官祐
之之女先君一年卒子男三人長叔慈次叔獻皆太子
右內率府副率其季不及名而夭女子六人四人尚幼
其二亦夭死嘉祐五年十月詔遣使者以君喪葬汝州
之梁縣祔于祖考之次而令詞臣敘其世系為之銘銘
曰

迺祖迺父惟王惟公同姓之恩雖遠猶豐孰謂若人稟
命不融年不逾壯位不過庸刻銘其丘以永無窮

皇姪故銀青光祿大夫檢校國子祭酒行右清道
率府率兼御史大夫輕車都尉墓誌銘

君諱克協曾祖曰廷美秦悼王祖曰德雍廣陵康簡王
父曰承睦處州觀察使母隴西郡君董氏生十餘歲方
有詔賜以名補右班殿直已而以殿直秩卑改太子右
監門率府副率久之遷右清道率府率故事宗室無吏
職其遷無常期朝廷有大禮輒推恩進階策勲凡三加
恩得銀青光祿大夫檢校國子祭酒兼御史大夫輕車

都尉年二十七慶歷八年七月辛丑以疾卒其為人內
和外順宗室佳子弟也奕棋學書人亦頗稱其能娶李
氏禮部侍郎應機之孫子叔頤為右監門率府率嘉祐
五年十月葬汝州梁縣悼王之塋內于君之卒凡十有
三年云銘曰

族食世降疎戚有倫振振公路並受渥恩其恩如何結
綬乘軒修塗未半天奪之年輜車還葬祔祖以孫尚有
餘慶幸其後昆

皇姪孫故銀青光祿大夫檢校國子祭酒行右監
門衛將軍兼御史大夫上護軍天水縣開國子食
邑六百戶贈右武衛大將軍墓誌銘

皇再從孫銀青光祿大夫檢校國子祭酒行右監門衛
將軍兼御史大夫上護軍天水縣開國子食邑六百戶
贈右武衛大將軍叔詹其先出秦悼王曾祖曰保平軍
節度使德鈞祖曰儀崇使承震考曰河內侯克明母慕
容氏封清福縣君君生十餘歲補右班殿直已而改太

予右監門率府副率君初賜名叔昭避叔祖德昭諱有
詔改命遷右清道率府率明堂汎恩授右監門衛將軍
始開國天水縣君食邑三百戶更大禮進爵子益封亦
三百戶嘉祐三年十一月乙酉以疾卒年二十五矣娶
曹氏封金鄉縣君無子五年十月葬汝州梁縣君雖膏
粱少年然性溫厚喜讀書為詩其出入恂恂不逾節若
終享貴壽者既夭過早死又無後不祀何耶然其卒也
天子贈以大將軍印綬其葬也使者護視詞臣為之記

其于哀榮亦可謂備矣銘曰

有貴之勢無待于賢有賢之資無愧于金兩者遂矣而
訕于年非命也耶其誰使然

皇兄故深州團練使承訓妻安定郡夫人張氏墓

誌銘

夫人姓張氏曾祖璉贈祕書丞祖炳贈光祿卿父利用
內殿崇班閤門祇候母金城縣君薛氏夫人以大中祥
符七年歸于秦邸稱來婦年十有八矣明道中以恩封

上谷郡君皇祐三年進封安定郡夫人生子男五人克勤克儉克裡克孚克懋克勤右屯衛大將軍秦州團練使克儉右千牛衛大將軍克裡左侍禁克孚右屯衛大將軍克懋右監門衛大將軍儉裡並前卒女三人皆有湯沐封然不嫁讀老子書居太和宮為道士賜名曰道正道昇道仙云夫人大王父王父三世儒者習為禮義能知書又通于音溫柔慈良母有多子年六十六嘉祐四年十二月壬戌以疾卒明年權殯法濟僧舍十月葬

汝州梁縣凡宗室雖甚材無事職于外其言行固莫得而聞而宗婦無外事于家其莫得聞又益甚然而視其奉祭祀和宗族教子孫壽考且寧其賢亦可知矣銘曰婦稱外成亦允有命或成或隳未必皆幸祁祁夫人習善厥躬來歸于宗繼啟其封魚軒象服小君之飾惠于皇天以彰有德有子有孫肅何詵詵其慶繩繩其誨諄諄六十有四未足云壽柔惠之風是用詒後

皇姪故和州防禦使歷陽侯夫人安福縣君王氏

墓誌銘

夫人姓王氏曾祖贊贈崇信軍節度觀察留後祖文慶
贈左武衛將軍父承彬內殿承制夫人既世仕朝廷閨
門有法而其性亦婉慤溫厚可以配君子生十有七歲
歸于宗室故和州防禦使歷陽侯克周克周上從祖兄
弟之子也族近世貴夫人能嬪以禮既三年封安福縣
君有子男二人長曰叔何為太子右內率府率次曰叔
苗為副率女二人皇祐二年十月甲戌以疾卒于廣親

卽第年二十有七後十歲得嘉祐五年十月葬汝州梁
縣祔其先祖姑云銘曰

婦以義從得其歸難又況王族富貴顯嚴婉慙夫人出
于良輿作嬪公侯其節靜好齋祓祭祀肅恭朝會小君
之尊湯沐是賚貴且有子奚福如之獨不永年云何其
悲

皇姪右屯衛大將軍克戒妻太寧縣君李氏墓誌
銘

李氏尚書駕部員外郎定之曾孫國子博士京之孫屯田郎中周珣之女年十有七以禮選納為克戒婦事尊章盡其勤孝上承下接皆有禮意族人稱其婦德婦功婦容婦言皆具之慶歷中封大寧縣君至和二年十一月丁丑以疾卒年三十有五凡生七男九女男曰叔杲右千牛衛將軍曰叔穀叔滿叔涉皆太子右內率府副率三人不及名而天長女嫁右班殿直王定次嫁右班殿直張從政其二早卒其一學浮屠為比丘尼居資聖

禪院其四尚幼嘉祐五年十月葬汝州梁縣先姑之塋
銘曰

古之嫁者教于公宮禮義之益實被其宗夫人之先世
世儒者蘋藻之習自其牖下既得所從孔惠且溫媚于
尊章上下欣欣九女七男是謂多慶而不永齡嗟哉其
命

皇姪右監門衛將軍克淳妻追封仙遊縣君李氏
墓誌銘

皇再從昆弟之子右監門衛將軍克淳妻李氏皇城使
高州刺史繼中之女贈司徒斌之孫贈驍騎大將軍訓
之曾孫年十有四慶歷八年以禮稱來婦性溫惠敏于
女工又善書頗知為文其習好若此非世祿及將家所
為也凡生一女早夭皇祐三年五月庚午感疾卒享年
十有八以未及賜邑封詔特以仙遊縣為湯沐追告其
殯嘉祐五年十月日自京師歸葬汝州梁縣祔其先祖
姑而命詞臣為之銘銘曰

歸得其從天子之宗從得其職公侯之宮賢也宜永壽
何不容赫赫王命追褒邑封副筭展翟既祿其躬納銘
壤下以質無窮

皇姪右監門衛將軍克常妻濮陽縣君盧氏墓誌
銘

夫人姓盧氏曾祖贊東上閤門使誠州刺史祖亮太子
右監門率府率父炳泉州德化令外族周氏年十有六
以禮聘為克常婦克常于天子再從兄弟之子曾祖祖

父封皆至王公親近族大支庶繁衍然夫人稱為能孝其宗沈靜謙順樂于為善封濮陽縣君至和二年十二月甲寅以疾卒年二十有九生子男二人長曰叔興太子右監門率府率次曰叔邑大子右內率府副率女四人二早夭二尚幼其殯于門封法濟寺其葬于汝州梁縣實嘉祐五年十月云銘曰

王族縣縣其麗不億風教之首亦繫內則盧為著姓前世尤盛有婉夫人載其休令歸于良夫宗族以愉有子

有封短年何吁凡葬有銘以視來裔刻此堅石閔于幽

隧

公是集卷五十二

欽定四庫全書

公是集卷五十三

宋 劉敞 撰

墓誌銘

大中大夫行刑部侍郎致仕上柱國賜紫金魚袋

俞公墓誌銘

公諱獻卿字諫臣其先河間人晉永嘉之亂徙居黔歛
公之父曰某贈工部尚書尚書之父曰某某之父曰某

皆蓄德不仕慶詒其後尚書取閔氏贈太原郡君實生
二子長曰獻可官至某官天章閣待制其季則公公之
初學師友某兄強力敏捷儒術自任其後遂相繼成進
士名聞天下云拜壽州芍陂尉臨事明察善鈎人情推
顯至于隱故盜賊不敢發發又輒得人有告其師浮屠
出遊者公揣其有姦使吏拘之而索其室得浮屠之尸
一縣大驚以為有神轉昭州軍事推官陳進亂嶺南象
州危甚吏民莫自堅其太守欲背城奔使公往護之公

至為說利害復教使堅壁治兵為不可攻太守急聽其
言得免誅賊亦不至官兵之在宣州公部昭民往輸之
粟及事平議留昭民伐山林以治官府曰役病矣不可
以不示信請期三日許之民間公令知不久役皆勸功
趣事事如其素陳進死上功第一賞未行丁尚書憂喪
畢轉大理寺丞為本寺詳斷官選殿中丞知廬州慎縣
又換杭州仁和縣丁母夫人憂服除改太常博士知南
雄州潮陽吏民不相能訟繫不決一郡恟恟徙公知潮

陽鑄其曲直潮陽又多水害公親相地勢築防金山百姓便之轉屯田員外郎大臣薦可為郡守歷兩院御史領左軍巡使舉察稱職拜三司鹽鐵判官上初即位公疏言民力不足其弊在取之太繁用之太奢可減冗食及諸無益引先帝為法累數百言天子嘉之罷清衛兵及省浮屠老子祠醮公本謀也淮南二浙一歲耗鹽十萬尚書經費不足公往示之至則條廢舊弊以新法從事吏盡償所負又增五百萬石以兄為鹽鐵副使改

開封府推官會陝西言兵食不足轉運使非其人朝議
換之上亦重其選宰相數奏進擬無合意者召公問狀
公不辭讓因入言之天子識公名曰是前使淮南者可
奏公至部三日得半年之儲終歲餘二年之食雖一切
方略然其百姓富者不病貧者不擾云涇原塞外武延
川本羌地諸將請築堡鑿濠守之公奏以謂生事不可
許已而寇果至殺掠吏士塞所鑿濠而去轉兵部員外
郎遷京西召對邊事薦趙某可將帥賜三品服以兄沒

當募求為東南官改福建召還判鹽鐵勾院轉刑部郎
中居二年命直史館知荆南府進諫言事上聽不倦喜
曰卿不當往荊州即日拜三司戶部副使歷度支鹽鐵
三部轉右諫議大夫復出荆南滿歲授直集賢學士知
杭州登石作堤以捍江濤水不為災召回判三班院及
銀臺門下省出為宣州元昊畔西邊大擾詔書問所欲
施公條上十餘事朝廷稱其知時務徙知應天府改工
部侍郎以疾請老天子憂之以為刑部侍郎致仕聞其

居杭州即從徙二子官吳中以便奉養慶厯五年四月十七日終于所居享年七十有六明年某月某日葬歙州某縣之某原從先人居夫人馮翊郡君錢氏柔淑知禮是配是宜子四人長希楚某官次希元進士及第早夭次希及次希忠皆將作監主簿女三人長適祕書丞江杞其二未嫁公為人高明剛嚴論議立規矩似不能容物至典法持獄平易寬恕不肯妄有輕重其在京西錢丞相為許州厚賓客之奉歲費千萬執政素不說又疑

其有私公奏事至京師開其端問公公對曰無他世稱公長者累階至大中大夫勲至上柱國爵至開國伯食邑至九百戶所與交遊同僚多歷兩府事而公獨不遂可謂命矣銘曰

俞之先世基德相繼其大而章自公兄弟雍雍在家矯矯在官歷試以難富貴不愆忠而好謀天子是咨功濟西方國人不知辭老而休亦不踰距其風孔高以憚進取仲尼有言積善餘慶公實有子嗣武其盛

尚書屯田郎中提舉兗州仙源縣景靈宮王公墓

誌銘

公諱冲字景儒其先自太原遷宋居虞城祖化贈太傅
考礪贈太師中書令于今為顯家故弗論著也公少則
好學論議依名節慷慨自喜不與衆浮沈士友多憚之
祥符中舉服勤詞學成進士名得試校書郎知興國軍
永興縣父喪解官服除選于吏部試判優等為武安軍
掌書記授武昌軍崇陽氏陳廣與人鬪鬪者以他疾死

而吏劾廣殺人議寘大辟廣亦不能自明公擿其狀以聞有詔下旁郡覆廣獄廣卒無事轉運使竒其意欲為之請賞公辭不受天聖初改著作佐郎知壽州霍邱縣吏積不治盜賊放橫公使其百姓鄰伍相收司而以耳目一切糾發老姦宿逋中盡服禽無脫者徙蜀州晉源改祕書丞知陳留當是時章獻太后垂簾聽朝而中人用事者羅崇勲之徒交通縣豪借之意氣以漁奪細民吏不敢何公獨以法繩之請謁無所聽大姓田滋等

由此懼造飛語以姦利事汙公太后果怒下公吏使中人雜治之訊掠甚急欲公自誣服公義不屈寧必死不肯少自下獄遂不具然猶坐除名徙雷州景祐初上始親政盡斥逐羅崇勲等諸附麗之者亦貶廢言事者多以公不辜聞天子亦自識其名復起為衛尉寺丞又詔盡雪向罪後勿用以為負改著作佐郎知越州會稽縣都巡檢使張懷信所部兵亂百姓恟懼欲逃入山谷間公策其不足虞固請徹城門兵以堅衆心郡中由是安

康定初復為祕書丞通判乾州自元昊畔邊將數戰不利而民力以屈公上備邊禦戎等策及言復鄭國渠以實關中事遂施行通判華州月餘擢知乾州遷太常博士知洋州真符縣言民家失火舉族焚死公視其狀曰必仇者為之教吏推迹其人與三日期賊果得一郡大驚以為神明郡故無學公為立黌舍收其才子弟得二十三人親教養之吏觀聽悅喜由此彬彬然興于學與西州等矣遷屯田員外郎知秦州明年改都官歲饑發

常平倉以食飢者凡所活數萬人使者上其治為淮南
第一賜緋衣魚符改職方領南京留司御史臺就遷屯
田郎中提舉兗州仙源縣景靈宮受詔未行嘉祐元年
十一月甲子以疾終年六十八後三年十月甲子塋某
原初公起黃綬至二千石更四縣五州所居見紀未嘗
官京師一為陳留以剛直幾不免猶濱于死及復召士
大夫翕然向仰之異其且大用然遂汨沒不進未能如
其意稱其量也自以道終不行而公長兄年九十矣以

太子賓客謝事家居故求為留司官以優游相從鄉閭
間怡怡如也有終焉之規嗚呼可謂篤于義知所進退
不失其正者矣性不妄悅人謂窮困益堅于時人鮮所
合而范文正公特知之數薦于朝其為政也勇于當事
興利若不及去惡如恐失之亦以此故仕嘗難進易退
然其處之晏然未嘗以見色辭喜讀書屬文尤長于詩
詩凡千餘篇讀之其志可見也夫人葉氏封馮翊縣君
三子長漢臣進士及第為長舉令次真臣試將作監主

簿皆能世其家者也次某尚幼三女長適大理寺丞尚
穎次適祕書丞孫珪其季未嫁某也公之甥也故于公
之葬得敘其志而銘其哀銘曰

為道者有言白則涅矣剛則缺矣嗟嗟舅氏涅而不變
缺而不卷硜硜其聲矯矯其行極晦而明其辱則榮孰
不公侯孰不耄期人也天歟其止于斯我葬舅氏悠悠
我思銘以藏之以寫我悲

故尚書虞部員外郎分司南京贈光祿卿杜君墓

誌銘

君諱惟則字定國姓杜氏其先蜀人少舉進士不遇而
其兄以尚書郎守睦州當先帝即位四方賀受命君亦
奉其兄章上禮有司天子嘉之召試學士院得試祕書
省校書郎調含山縣主簿南雄州司理參軍稍遷德清
江都令川薦者言改大理寺丞知南安縣徙知雷州是
時瓊管有大獄太守坐擊者千八百人吏民恟恐上下
莫自安百姓廢業而夷獠素易吏狙伺重輕轉運使患

之以獄事屬君君颿海風一日至郡下條其情狀悉罷遣千人百餘人而取其尤桀惡當坐者具獄上廷尉朝廷是之吏民賴以安改太子中舍通判濠州賜緋衣銀章又改殿中丞通判杭州乾興中轉國子博士知處州遷尚書虞部員外郎年老自表分司南京因家于雍丘君為人溫厚和易與人交尚義久而益恭其言必踐之不為虛詞以導悅人亦未嘗斥人過至于仕宦視公事如私視百姓如家人苟可以便之必商度處畫使得其

宜而後已不求為名故所至見愛去之輒見思及其謝事歸居也鄉里慕仰之稱為誠長者曾祖某祖某皆不仕考某贈太僕卿夫人某氏封某縣君四子長某早卒次子某次舜元次叔元三人者天聖八年同歲進士而君夫人尚皆壽考無恙兄弟既成名還家拜慶一縣往賀之車馬塞里巷士大夫以為榮君隨其少子官淮陰明年十一月某甲子卒享年八十二未及歸葬夫人長子次子諸婦諸孫相繼又卒貧不能自還且三十年叔

元乃克舉君之喪葬于某鄉某原而盡祔其餘實嘉祐
五年七月甲子云叔元固善士孝慈有志節自其宦于
朝數以令請贈君官至光祿卿然叔元之事親其設心
以謂必已之所自盡者然後懽于義是以其得反葬為
艱且久矣銘曰

以仕必才耶致仕一州不為卑矣以壽必仁耶至于耄
期不云微矣嗟嗟杜君樂易信厚長者之規矣實有良
子實收實食謂天不可信于此乎視納銘其邱以詔後

世

故朝散大夫尚書刑部郎中致仕上柱國賜紫金

魚袋張公墓誌銘

公諱沔字楚望姓張氏其先出留侯子房三國之分紘
仕孫氏由是為江南人其後居鄱陽者曰子員子員生
瑤瑤徙建安之浦城瑤生厲厲生大王父從晟從晟生
曾王父贊贊生王父靄靄生考瓌自王父而上皆仕南
唐不及見天下之平公考見天下之平而早世不及仕

故不聞于時公之孤八歲矣雖幼知感慕沈靜不戲狎
異于他兒少長發其家書讀之勤志強力期以文學成名
當是時楊文公以文章名一世于公鄉里外姻也因起
從之游游楊氏之門者常數十百人而公以才見稱祥
符初舉進士甲科得試校書郎知撫州臨州縣再調睦
州遂安縣治皆有聲用薦者言改大理寺丞知平陽縣
遷殿中丞母憂去官服除知溧水縣轉太常博士通判
温州賜緋衣銀魚莊獻稱制張旻以舊德用驕僭亂法

公上書請出旻補外事雖不即行然士大夫忻然向之擢御史臺推直官轉尚書屯田都官員外郎嘗奉使決大獄朝中稱其平丞相李文忠公善之拜侍御史數月呂文靖復入相二人者不相能爭于上前以謂故事三院由中丞薦不當以執政用出公知信州既至又移福州歲餘乃復召還言事引大體正得失而已不苛細充開封府判官轉兵部員外郎改三司鹽鐵判官出為淮南轉運使賜金紫轉工部郎中復入為鹽鐵判官假諫議大

夫使契丹還言敵情慢疑有非常宜救邊為備既而敵果以兵臨境求關南地如公策慶厯二年加直史館知陝州明年轉刑部郎中元昊入涇原敗葛懷敏數十萬之師關中震驚兵少不足自守朝議不暇遠發使中貴人即峭澗之間遮四路歸戍悉還補其闕兵久乘塞自以得生歸與妻子相見復驅之就死地人人怨呼以言相激拔刃彊弩且欲絕河橋為變中貴人無若之何疾馳入陝以詔書屬公而去吏民駭懼奔逃公單馬出城

矯詔諭之曰賊已出境受詔諸軍趣還營毋得差池衆見公之易也帖然皆斂兵就道莫復諠譁于是范文正經畧關中梁丞相奉使延州皆奏議以公權事合變消亂止禍宜厚其賞朝廷不能用契丹復修好除邊關備徙公河北轉運使初保州以被邊故戍兵廩賜厚他處及張昷之為轉運使議有所增損軍中怨之相率殺守佐閉城反諸將聞變爭欲急攻城大兵會城下幾十餘萬公獨不聽曰兵驕故作亂耳民不反也攻城必多所

殘百姓何罪且城未易攻與之相反覆諸將不能奪乃
登東關門呼首惡者諭以禍福使出降衆皆踊躍投兵
杖再拜曰公活我願見詔書面縛後旬餘天子為遣近
臣受其降卒全一城者公本謀也猶以事不先覺貶秩
知汝州富丞相宣撫河北封敕不下曰張某有謀功乃
當賞祭何奪之位然天子以輩例皆貶故不許公為人
溫恕仁讓在朝廷恂恂無所競稱為博厚長者至臨急
變勇銳堅決以身蹈不測處之不疑其治軍旅應變畫

策能任大事雖宿將無以校得失百姓賴以安豈所謂
仁者必有勇耶移知宿州初陳恭公有所愛吏私屬公
公不應及其在位因事左遷公都官員外郎監宣州銳
士大夫由此惡之不平于其免相也乃復得工部郎中
知廣德軍又遷刑部郎中江南東路轉運使召還判三
司戶部勾院未幾自請治明州有詔視三路轉運使歲
滿當入朝因上章請老子蘇天子許焉用其少子為州
從事以便奉養初公以材進數試繁劇有異效世許其

任公卿其後失意更不遷而新進常輩名位頗多超處
其右自丞相以下數稱其功理其枉然遂終不用十有
餘年他人為公恨而公處之晏然未嘗寘色辭性庶不
治家人活業仰俸祿以生而厚于宗族鄉黨賓客所資
養周給稱其意厚薄初不計有無及其歸家居也囊篋
無餘貲所居纔蔽風雨飲食或日闕亦不以累其志改
其樂嘉祐五年某月某甲子無疾卒享年七十有八積
階朝散大夫勲上柱國夫人魏氏封某縣君子三人皆

孝謹諷太子中舍詵太常博士誨則州從事者也女五人皆嫁名家明年某月某日葬某縣某鄉之穹隆山吾聞有陰德者有陽報不在其身在其子孫若公之德多矣殆亦其後且大乎銘曰

仕繫其逢進退有時嗟我張公長者之規排難寢兵洞然至誠不伐不矜棄功與名富貴磨滅令德則長惠之在人世以不忘穹隆之葬公則有子宜爾子孫尚食廟祀

朝散大夫殿中丞知汝州葉縣騎都尉陳君墓誌

銘

君諱耿字仲操真定人祖日審交父曰昌業世世傳鄭氏禮皆不仕君受學父祖祥符初以經中第得上元尉厯永定軍司理參軍霸州錄事叅軍甘泉令遷建雄軍節度推官知永濟縣丞相沂公鎮魏善其政奏徙大名大名治城內事尤劇歲滿課最得見上拜權永清軍節度判官初丞相率其屬連奏舉君可京官必得之而纔

稍遷丞相以為賞薄知其有親更敕其弟子融辟君監
光州茶場便奉養數月以憂免其後服除為蘇州觀察
支使達官鉅人薦君材能于朝者前後十餘章改祕書
省著作佐郎知霍丘頃之移閬中遷太子左贊善大夫代
還除葉縣未行又遷中丞慶曆八年十一月五日卒于
家享年七十五君為人廉直不阿勢附俗而內恕有愛
故長于為政其在永定軍人有殺死于路者賊不得其
子疑怨家所為詣吏辨訴吏以子言名捕訴者按之證

逮詢囚無以自明君察其不真訟繫待訊而急自守
丞請捕賊守丞怒曰司理侮法耶何敢為死罪解脫遣
他掾與司理雜治囚笞掠數百千囚不勝痛誣服具獄
待報君猶守之不聽人皆為君懼明年博野縣捕得真
殺人者舉郡大驚衆乃皆伏及為永濟縣當契丹使往
來道自先帝與戎約和結兄弟歲時聘問一以敵國禮
待之使者入境天子使中貴人候迓饋勞冠蓋相屬其
有求市令所司調與之以見中國廣大厚其歡心而少

從旁縣賦取蹴迫令長稽緩不如意輒劾以違制文移倉猝百姓騷擾歲歲苦之畧比軍興而縣吏鄉典亦利得其勢侵漁細民其敝蓋久及君至為設方略飲食供張百物皆豫儲待後使者過縣有所調取不復及民民便安之王丞相由此知君其始至閭中歲大旱郡守希轉運使意不聽民訴災民遮君自言君即詣府請之猶不許因趨出悉取民所訴狀屬吏以令蠲其租而公文上轉運使轉運使初不悅後無如之何文丞相守成都

聞而嘉之更分遣官屬行視兩川郡縣之被災者皆奏
除其租獨閬中由君免于流亡而上恩浸淫至于東西
川十有餘萬戶矣君晚升朝贈其父大理寺丞母崔氏
仙游縣君位雖不大顯世守榮焉娶薛氏封高平縣君
先君卒子五人女四人初君仕官過汝陰樂之築室焉
君既沒三歲十二月丙申諸子裔奇京蘇等乃以君及
高平之喪葬懷音鄉之高原以成君志奇舉進士與予
同歲孝友慈祥予甚知之故予得銘其葬庶幾不朽云

銘曰

學如其才有以顯親仕如其職有以便民壽爾厥年夫
又何怨卜處于此實惟君存蓋古別子百世不遷尚越
其延施于後昆

翰林學士吳君前夫人趙氏墓誌銘

翰林學士吳君長文之元配趙夫人者冀州言都人父
立仕為遂平令家頗饒于財憐其子為擇所從至年二
十翰林君尚未仕治孔氏書王氏易通達有聞而遂平

賢之以女子之夫人既歸吳氏事尊章迨及祖姑婉孌
敏恪執勤左右夙夜不懈雖退居其宮未嘗有隋色吳
氏甚貧夫人不敢有私財自其所齋服玩器用百物者苟
可以備家費緩急無所愛以故族人無內外小大皆歸
其賢翰林以經明選于禮部調回福州古田尉廣信軍
判官夫人皆隨以往人謂其去舅姑之側當少假豫自
寬而夫人滋益恭猶其故時也觀其志不為遠近有所
輟作雖賢士大夫或不能矣寶元二年八月二十二日

以疾終年二十二其後翰林以庶能升王朝又舉賢良對策直言天子用為諫臣遂掌制命召為學士顯貴得封其妻縣郡君而夫人不及封人皆為之恨夫人凡生一男二女男曰璟有至性其幼也未能識其母長而思慕悲哀有過于人者今補太廟室長長女嫁祕書省著作佐郎胡稷臣而亡其次嫁泉州司法參軍王孝寬初吳氏自齊之禹城徙北海九世矣由曾祖而下藁碑未葬翰林卜其地得東阿之魚山鄉孟柵原為吉嘉祐四年

十月告于朝遷曾祖妣王考以葬而舉夫人之喪以從
曰生不與我同其樂矣死若有知也其祔于祖姑尚獲
其志焉銘曰

女得其歸婦宜其家不幸不淑悲如之何夫也瑩之子
也承之祔于祖姑萬世其寧之

公是集卷五十三

欽定四庫全書

公是集卷五十四

宋 劉敞 撰

石記

皇姪孫故右內率府副率叔舍石記

太子右內率府副率叔舍上之再從姪孫曾祖曰德彝
昭德軍節度使兼中書令潁川郡王祖曰承錫左屯衛
大將軍楚州團練使父克闢右千牛衛將軍母曰吳氏

陳留縣君嘉祐元年十一月己丑生于宮邸二年四月以宗室長子賜名為太子右內率府副率四年六月甲子以疾終厝奉先佛寺五年十月葬汝州梁縣古之道天下無生而貴者故雖王者之子猶勝衣冠而後爵之然亦任其事責以職時有不能以恩全者矣國朝變此制公族雖疎遠皆以官祿富貴之而終不任以事使之必全其待長嫡又加異故叔舍未至能言而官矣然亦天過早死豈固有命耶謹記

故右監門率府率克壯石記

皇再從姪故銀青光祿大夫檢校國子祭酒行右監門
率府率兼御史上騎都尉贈左領軍衛將軍克壯字稱
之慶歷三年五月二十二日生生四歲詔賜之名拜太
子右內率府副率又四年上祀明堂宗室之助祭者仲叔
季弟幼子童孫不問能與未能勝衣冠皆賜爵進秩由
是遷右監門率府率嘉祐四年年十有七矣六月乙酉
以疾不起聞詔贈左領軍衛將軍自始賜名至于終積

階銀青光祿大夫檢校國子祭酒兼官侍御史策勲上
騎都尉益見其進未見其止也曾祖廷美秦悼王祖德
雍廣陵康簡王父承亮磁州防禦使母杜氏初其出就
外傳也尤警速成有所授學未嘗不以忠孝為言磁州
賢之謂其左右曰此我家寶也性多所通于書畫音律
皆精過人比其卒尚未娶故無後明年十月葬汝州梁
縣其先王之墓次固有苗而不秀者耶敘其行事以塞
詔旨以表其寵穴謹記

皇姪孫故太子右內率府副率叔罕石記

皇姪孫叔罕者慶厯五年五月八日生生五歲以乾元
節與宗室子弟皆上壽得召見因賜名授太子右內率
府副率明年正月十三日有疾卒嘉祐五年十月葬汝
州梁縣曾祖德彛保信軍節度觀察留後贈昭德軍節
度使兼中書令潁川郡王祖承矩莊宅使贈洺州防禦
使廣平侯父克循右監門衛大將軍柳州刺史母劉氏
其葬雖以殤略然自啟至窆猶使使者以王命督視云

謹記

皇姪孫故右內率府副率叔疾石記

皇姪孫太子右內率府副率叔疾其父克廣右監門衛大將軍其祖承矩贈洺州防禦使廣平侯其曾祖德彝贈中書令潁川王其母楊氏其生以皇祐元年八月其賜名以五年四月其卒以九月其他官以銀青光祿大夫檢校國子祭酒兼監察御史武騎尉其葬以嘉祐五年十月甲子實祔其高祖秦悼王之園有詔刻其世繫

于石而藏于其墓所以異宗室之恩云謹記

皇姪玄孫故太子右內率府季培石記

皇姪玄孫季培其先出奉悼王曾祖曰克已右千牛衛大將軍祖曰叔韶右屯衛大將軍賀州刺史父檢之右千牛衛將軍檢之于悼王五世矣季培之生以嘉祐四年三月其世次上從祖兄弟曾孫之子也最遠生月餘即賜名授太子右內率府副率階勲兼官檢校皆如故事所以優宗室長子異其禮其年十月八日夭死曆延

祥院明年十月日葬海州梁縣有詔刻石識其寢云謹記

皇姪曾孫太子右內率府副率持之石記

太子右內率持之至和二年六月三日生生一年以宗室長子賜名除太子右內率府副率嘉祐三年八月十八日卒厝于延祥佛舍又二年十月葬于汝州梁縣先王之塋曾祖承勛贈宮苑使宜州刺史祖克構贈邠州觀察使新平侯父叔璪右千牛衛將軍母王氏持之于

天子為再從曾孫其屬益已疎遠然其所以愛厚敦睦禮秩如一將長養而富貴之不幸早死命也夫謹記

皇姪孫太子右內率府副率叔陂石記

皇姪孫陂至和二年十月二十日生嘉祐四年乾元節用家人禮上壽見省中賜以名拜太子右內率府副率其階光祿大夫加銀印青綬檢校國子祭酒兼官監察御史勲武騎尉所以寵秩之甚厚其年七月三日感疾卒益生五歲矣下殤也墓遠未得葬厝禪惠佛舍嘉祐

五年十月乃葬汝州梁縣祔于其先王之墓曾祖曰德恭追封高密郡王祖曰承慶循國公父曰克絢右屯衛大將軍母王氏無命號此其世系也謹記

故右監門率府率克播石記

皇從祖兄弟之子銀青光祿大夫檢校國子祭酒行右監門率府率兼殿中侍御史上騎都尉克播字伯芳廣陵康簡王德雍之孫磁州防禦使承亮之第十一子母杜氏以寶元元年十二月生于宮邸慶厯二年始賜名

授太子右內率府副府得銀青光祿大夫檢校國子祭
酒兼監察御史武騎射其後遷右監門率府率加兼殿
中侍御史上騎都尉幼聰悟機速有成人之姿磁州愛
之甚日課使學書未嘗有倦色其用法頗得古法嘉祐
元年十月甲子感疾卒年甫十有二云權瘞奉先佛寺
後十二年當嘉祐五年十月乃葬汝州梁縣曾祖秦悼
王之塋是雖于禮殤且無後然天子猶以族人之愛使
使者護葬事詞臣為之志以成人之禮處之可謂厚也

已謹記

皇再從姪曾孫太子右內率府副率化之石記

皇再從姪孫化之者右監門衛將軍叔廣之長子祖曰克已贈深州防禦使饒陽侯曾祖曰承壽贈均州防禦使武當侯化之以皇祐二年九月一日生明年以宗室長子賜名授太子右內率府副率其年六月二十一日病不育嘉祐五年十月葬于汝州梁縣先王之園是古所謂無服之殤也然其禮亦備矣謹記

皇姪孫故右監門率府率叔疊石記

皇姪孫叔疊其先出秦悼王曰祖曰德恭衡州防禦使
祖曰承壽南作坊使父曰克基右武衛大將軍母曰扶
風縣君宋氏以慶厯三年始生生五歲始賜名遂以為
太子右內率府副率上祀明堂復以恩遷右監門率府
率初出就外傳知愛書事筆硯不類諸兒皇祐五年六
月三日以疾終年十有一歲矣殯普濟佛寺嘉祐五年
十月日葬汝州梁縣從其先祖之兆云謹記

皇姪孫故太子右內率府副率叔鼎石記

皇姪孫叔鼎其父曰右屯衛大將軍克殉其祖曰贈武
信軍節度使循國公承慶其曾祖曰贈護國軍節度使
兼侍中高密郡王德恭德恭之父則秦悼王故叔鼎于
上為從祖兄弟之孫生五歲則賜以名及官得銀青光
祿大夫檢校國子祭酒行太子右內率府副率兼監察
御史武騎射而疾卒實至和二年九月十日猶以成人
禮殯延祥佛寺後五年乃葬汝州梁縣其高曾之墓兆

實嘉祐五年十月日云謹記

皇姪孫故內率府副率叔閭石記

皇帝再從姪孫銀青光祿大夫檢校國子祭酒行太子
右內率府副率兼監察御史武尉騎叔閭者贈昭德軍
節度使兼中書令潁川郡王德彝之曾孫贈武信軍節
度觀察留後遂寧郡公承衍之孫左武衛大將軍克諧
之長子母曰馮氏皇祐四年四月四日生生旬日以乾
元節預宗室長子例賜名除太子右內率府副率明年

五月二十日卒遂厝于昭聖禪院嘉祐五年十月葬于汝州梁縣從高祖秦悼王之塋是誠不幸而天矣然而其生有爵其死有歸其葬有誌是殤以成人之禮居也豈不亦幸耶謹記

皇姪孫故右監門率府率叔僧石記

皇姪孫叔僧慶厯丁亥十二月二十日生明年以宗室長子例賜名授太子右內率府副率皇祐二年上祀明堂用汎恩遷右監門率府率至和元年十一月九日以

疾卒始八歲厝于東興福佛舍曾祖德恭衡州防禦使
贈護國軍節度使兼侍中高密郡王祖承慶和州團練
使贈武信軍節度使循國公父克顏右千牛衛將軍母
樂壽縣君高氏嘉祐五年十月葬汝州梁縣祔于先王
先公下殤也然以親親恩錄其義已厚矣謹記

皇再從姪孫右千牛衛將軍叔策妻萬年縣君王
氏石記

皇再從姪孫右千牛衛將軍叔策妻萬年縣君王氏者

西頭供奉官漢賓之曾孫右班殿直從周之孫三班奉
職溫恭之女年十有六以禮成婚至和二年封萬年縣
君明年六月庚申得病死殯奉先資福院後四年嘉祐
五年十月某日葬汝州梁縣上于宗室思厚其子孫服
屬雖遠苟勝衣冠能趨拜無不命以官者王歸為叔策
婦安富亦樂矣然不能成于姓甫三歲而亡其命也哉
謹記

公是集卷五十四